
Զորավար Անդրանիկի ծննդյան
150-ամյակի առթիվ

ԱՆԴՐԱՆԻԿ. ԾԱՆՈԹ ԵՎ ԱՆԾԱՆՈԹ ՀԵՐՈՍԱՊԵՏԸ

ԿԱՐՈ ՎԱՐԴԱՆՅԱՆ

*«Ու երբ Ակնունին, կոնկրեյի՛ նախագահ, անոր
քովը սողացեր է, ինչպես օձը Եվային, անոր
ըսելու համար, թե դուք Աստվածը պիտի
մնաք կուսակցությանը, Անդրանիկ՝
նախամայրեն*

ավելի տոկուն, պատասխանած է՝

*– Ավելի աղել է որ ես դուրսը մարդ մնամ,
քան թե ձեր մեջ Աստված»²:*

Ավետիս Թերզիբաշյան

*Ռուս ռազմական պատմաբան Ալեքսեյ Շիշովը երկար տարիների ուսում-
նասիրությունների արդյունքում 2005 թ. լույս
ընծայեց հանրագիտարանային բնույթի մի աշ-
խատություն՝ «100 մեծ հերոսները»³: Գրքում
տեղ են գտել մարդկությանը քաջ հայտնի 100 ա-
ռավել երևելի անուններ, որոնց գործունեությու-
նը բախտորոշ է եղել ոչ միայն սեփական ժողո-
վուրդների, այլև համաշխարհային պատմութ-
յան կարևորագույն իրադարձությունների
համար: Ընդգրկված ժամանակաշրջանն ան-
սահմանափակ է՝ անտիկ ժամանակներից
մինչև XX դարի սկիզբը (նորագույն ժամանա-*



*կաշրջանը ներկայացնող անվանի ռազմական գործիչների իրական տեղն ու
դերը գնահատելու համար պատմագրությանը դեռ տասնամյակներ են անհ-
րաժեշտ):*

*Ցավոք, հայկական այլևայլ շրջանակներն այդպես էլ անհաղորդ մնացին
այս ուշագրավ աշխատությանը, այնինչ պետք է առաջինն արձագանքողնե-
րից լինեինք, պատվավոր տեղ տայինք այս գրքին մեր գրադարաններում,
գրախանութներում, մասնավորապես՝ ռազմահայրենասիրական ուղղվա-*

¹ Խոսքը ՀՅԴ Վիեննայի 1907 թ. կոնգրեսի մասին է:

² Ա. Վ. Թերզիբաշյան. Անդրանիկ, Փարիզ, 1942, էջ 106–107:

³ А. Ш и ш о в. 100 великих героев. М., 2005, с. 470–472.

ծության կրթական հաստատություններում: Հենց միայն նրա համար, որ թերթելով գրքի էջերը, մարդկության պատմությունը կերտած ամենահզորների՝ Աթիլլեսի, Ալեքսանդր Մակեդոնացու, Հաննիբալի, Հուլիոս Կեսարի, Մպարտակի, Աթիլլայի, Ուիլյամ Ուոլտսի, Ժաննա դ'Արկի, Վաշինգթոնի, Նապոլեոն Բոնապարտի, Լակշմի Բայի, Կուտուզովի, Մուվորովի, Գարիբալդիի և այլոց կողքին տեսնում ենք բոլոր ժամանակների մեր մեծագույն հերոսին՝ Ջորավար Անդրանիկին:

Ա. Շիշովը հիմնականում ճշգրիտ է ներկայացնում Անդրանիկի 30-ամյա մարտական հազեցած ուղին՝ շեշտադրելով հատկապես Բուլղարական ու Կովկասյան ճակատներում նրա ունեցած դերակատարությունը՝ օգտվելով Կովկասյան ճակատի պատասխանատու գեներալների (Ն. Յուդենիչ⁴, Ա. Միշլայնսկի, Ֆ. Չերնոգուբով, Բ. Տրուխին, Թ. Նազարբեկով և այլն) և այլոց հիացական վկայություններից, հողավածներից, զինվորական գեկուցագրերից, որոնցով, բարեբախտաբար, հազեցած է ժամանակի ռուս մամուլը:

Քանի որ հերոսները ներկայացված են ըստ ժամանակագրական կարգի, Շիշովի ցանկում Անդրանիկը 99-րդն է: Իսկ Անդրանիկին հաջորդում և ցանկը եզրափակում է... Մուստաֆա Քեմալը (Աթաթուրք):

Այն, որ Քեմալն իր ցեղի հերոսն է, որ Առաջին աշխարհամարտի արդյունքում գլխովին ջախջախված և քարտեզից վերանալու դատապարտված իր երկրից կարողացավ ստեղծել ժամանակակից աշխարհի ամենահզոր պետություններից մեկը, վիճարկման ենթակա չէ: Սակայն դրա համար չէ, որ հիշատակում ենք նրան: Եվ ոչ էլ նրա համար, որ տեղ է գտել մեր դյուցազունի կողքին: Այլ այն պատճառով, որ Անդրանիկին նվիրված հազարավոր մեծ ու փոքր գնահատականներից ամենադիպուկն ու իրատեսականը, թերևս, պատկանում է հենց Քեմալին:

Վկայողն անվանի լեզվաբան, թուրքագետ Հակոբ Մարթայանն է (Դիլաչար), ով լատինատառ դարձրեց թուրքերեն այբուբենը, և այդ լեզվում կատարված նշանակալի բարեփոխումների հեղինակ է⁵: 1934 թ. օգոստոսի 31-ին Աթաթուրքը խնջույք էր կազմակերպել՝ ի պատիվ այդ օրերին Թուրքիայում ընթացող լեզվաբանության միջազգային գիտաժողովին մասնակից օտարազգի լեզվաբանների: Երեկոն հետաքրքիր դարձնելու համար նա առաջարկում է հյուրերին իրենց մայրենի լեզուներով մեկական երգ երգել: Վերջում, նկատելով, որ Մարթայանը ողջ երեկոյի ընթացքում անտրամադիր է (տխուր էր, որոնքից էր այդ օրը Ջորավարի մահվան օրն էր), առաջարկում է, որ մի երգ էլ նա երգի: Մարթայանը ոտքի է կանգնում և, գիտակցելով իր արածի հնարավոր աղետալի հետևանքները, սկսում է ինքնամոռաց երգել գուսան Շերամի հայտնի երգը.

⁴ Բ դեպ, Կովկասյան ճակատի գորքերի գլխավոր հրամանատար, գեներալ-լեյտենանտ Նիկոլայ Յուդենիչը, ով Անդրանիկին որակում էր «խենթի պես քաջ», Ա. Շիշովի նախասիրած թեմաներից է (տե՛ս Ա. Սի և Ս. Օ. Վ. 100 великих героев. М., 2009, с. 471): Օսովյուն աշխատություն է նվիրել ռուս գեներալի գործունեությանը (տե՛ս Ա. Սի և Ս. Օ. Վ. Юденич. Генерал суворовской школы. М., 2005).

⁵ Մուստաֆա Քեմալին Հ. Մարթայանն է կոչել «Աթաթուրք» (թուրքերի հայր), վերջինս էլ Մարթայանին անվանել է «Դիլաչար» (լեզու բացող):

Իբրև արծիվ սավառնում ես լեռ ու ժայռ,
Թնդացնում ես երկինք, երկիր տենչավառ,
Սուրբ անունդ պիտի հիշվի դարեդար,
Հսկա լերինք քեզ ապաստան, Անդրանիկ...

Խնջույքին ներկա թուրք մեծամեծները անթաքույց կատաղությամբ սպասում են Աթաթուրքի արձագանքին: Նա համբերատար մինչև վերջ լսում է երգը և ասում. «Անդրանիկը մեր կատաղի թշնամին էր: Անոր սուրեն հազարավոր թուրքեր ինկան: Այդ տեսակ հերոս հայերը անցյալին չեն ունեցած, ներկայիս չկա և ապագային ալ չի սպասվիր»⁶: Շարունակությունը հետաքրքիր չէ: Շարունակությունը Մարթայանին ուղղված սպառնալիք է, որ Թուրքիայում այդ ատելի անունը այլևս չպետք է հնչի:

Պետք է նկատենք, որ իր այս խոսքերով Քեմալն արտահայտում էր ողջ թուրք հանրության մտայնությունը: Թուրքը մեր շարքերում իրեն արժանի միայն մի թշնամի է ճանաչել՝ Ջորավար Անդրանիկին կամ, ինչպես ինքն էր կոչում՝ Անդրանիկ փաշային: Մեր մյուս հերոսներին նա ճանաչել է մեկ շարքաթ, մեկ ամիս, մեկ տարի... այնքան ժամանակ, մինչև կարողացել է հաղթել նրանց, հալածել կամ սպանել, որից հետո մոռացության է մատնել: Անդրանիկը թուրքի համար այդպես էլ մնաց անպարտելի, մնաց որպես մշտնջենական մղձավանջ ու պատուհասող վրիժառու: Թերևս ոչ մի ազգային տոն թուրքին այնքան բերկրանք ու խանդավառություն չի պատճառել, որքան Անդրանիկի մահվան լուրը: Համենայն դեպս ժամանակի թուրք մամուլը շատ պերճախոս է այն երկարատև անասնական ցնծության մասին, որ Թուրքիայում ծայր առավ այդ լուրից: Բերենք մի հատված Ստամբուլի «Սոն Սաաթ» թերթի այդ օրերի մի հրապարակումից, որը թարգմանաբար լույս է ընծայել Ֆրեզնոյի «Մշակ» շաբաթաթերթը. «ԱՅՍ ՀՈՂԵՐՈՒՆ ՎՐԱՅ ԱՅԼ ԵՎ Ս ՈՉ ՄԵՎ ԱՆԴՐԱՆԻԿ ՊԻՏԻ ՄԻՒՄ: Այս խորագիրներուն տակ, երեկվան Սոն Սաաթ կը գրէ. – «Անդրանիկ մեռեր է. Մեր թերթը այս առթիվ «հոգին դժոխք» գրած էր երեկ. Իր մահեն հետո արտասանված այս աղոթքն անգամ բավական չէ բացատրելու համար այն գեշությունները, զորս թուրք ազգին հասցուցած է Անդրանիկ: ...Այլևս մայր հայրենիքը ոչ մեկ Անդրանիկի երազ պիտի սնուցանէ: Այլևս այս հողերուն վրա ոչ մեկ Անդրանիկ պիտի ծնի. Եթէ ծնի՝ չպիտի մեծնա, եթէ մեծնա՝ լեռը չպիտի ելլէ, եթէ լեռը ելլէ՝ չպիտի կրնա սուրը քաշել, եթէ քաշէ՝ իր կուրծքը մխելով անձնասպան ըլլալու համար միայն պիտի քաշէ:

Այս հողերուն վրա ապրող բոլոր հայրենակիցները միակ մեծ երազ մը պիտի ունենան. – Հավիտենական Թուրքիա»⁷:

Ինչ աստիճանի էր մեր դյուցազնը դադել արյունոտուշտ գազանին՝ նման բարբարոս ատելության արժանանալու համար:

Թե ինչպիսի գարհուրանք էր հարուցում Անդրանիկի սոսկ անունը թուրքերի և թաթար-ազերիների մեջ, վկայված է նաև գեներալ Գաբրիել Կորգանովի (Ղորղանյան) մի հուշում: 1918 թ. սկզբներին թաթարական հրոսակախումբը

⁶ «Տեղեկատու» (Կահիրե), հունվար, 2013, - 66, էջ 5:

⁷ «Մշակ» (Ֆրեզնո), 4. X. 1927:

Ախթալա կայարանում գրավում է գնացքը, կոտորում բոլոր հայ ուղևորներին և գերի վերցնում Կորգանովին: Թաթարները ցնծության մեջ էին, գերու գենե-րալական ուսադիրների պատճառով իրենք իրենց ներշնչել էին, թե բռնել են Անդրանիկ փաշին: Իզուր են անցնում Կորգանովի բացատրությունները, թե ինքը չի կարող Անդրանիկը լինել, թե ինքը շեկ է, Անդրանիկը՝ թուխ, թե ինքը ռուսախոս է, իսկ Անդրանիկը ռուսերեն չի խոսում: Թաթարները որոշում են, որ դրանով թանկագին գերին փորձում է իր կաշին փրկել և... «Ամենայն լրջու-թյամբ՝ թաթարները անոր կպատասխանեն, թե Անդրանիկ կրնա երևիլ ամեն կերպարանքով – ծեր, երիտասարդ, շեկ, թուխ. թե Անդրանիկ կրնա խոսիլ ու-զած լեզվով, քանի որ ան դև է»⁸:

Մի բանում թշնամին ճիշտ էր. մենք երկրորդ Անդրանիկ այլևս չունեցանք: Նրանից առաջ էլ այդպիսին չենք ունեցել:

Հազարամյակների մեր պատմության տարբեր հանգրվաններում ասպա-րեզ իջած մեր մեծանուն հերոսներից յուրաքանչյուրի անունը կապված է կա՛մ հայոց որևէ տարածաշրջանի, կա՛մ որևէ նշանավոր ճակատամարտի հետ: Մեկը Ավարայրի հերոսն է, մյուսը՝ Սյունիքի կամ Արցախի, մեկը Մասունի հերոսն է, մյուսը՝ Տարոնի: Մարդարապատն իր հերոսներն ունի, Վանը, Շա-տախը, Սեբաստիան, Շիրակը, Լոռին՝ իրենցը... Եվ միայն Անդրանիկի հաղ-թական շնչառությունն է տարածվում բովանդակ հայոց աշխարհի վրա: Անդ-րանիկը Մասունի ու Տարոնի հերոսն է, Անդրանիկը Վանի, Բիթլիսի ու Էրզ-րումի հերոսն է, հերոսն է Կարսի, Շիրակի, Լոռու, Տավուշի, Սյունիքի ու Նա-խիջևանի, Ղարաբաղի ու Ավարայրի... 1918 թ. հունիսին այս պատմական դաշտում՝ նույն Տղմուտ գետի ափին, Անդրանիկն իր հոգնաբեկ զինվորներով ջախջախեց թուրքական զորամիավորումները, շեշտակի գրոհով վերցրեց թուրքերի ձեռքին գտնվող Խոյ բերդաքաղաքը, այնուհետև դուրս եկավ քաղա-քից և նետվեց իր վրա շտապող Ալի Իսհան փաշայի դիվիզիայի վրա: Ցավոք, Ջուլֆայի կամրջի վրա Ջորավարի նշանակած կայազորը չկարողացավ կա-տարել նրա հրամանը, չկարողացավ արևմտահայ գաղթականների 35000-ա-նոց բազմությանը պահել Ջուլֆայում: Իր բախտը Անդրանիկի հետ կապած և ամեն քայլափոխի նրան կուրորեն հետևող ժողովուրդը տապալեց կայազորը, հեղեղի պես լցվեց Ավարայրի դաշտ և թշնամու հրետակոծությունից խուճա-պի մատնված՝ խառնվեց կոփող կողմերին, ստեղծեց մի աներևակայելի մղձա-վանջ ու քառս՝ տալով բազմաթիվ զոհեր: Ջորավարից գերմարդկային ջանքեր պահանջվեցին ճեղքելու թվով տասնապատիկ ավելի թշնամու օղակը և ժո-ղովրդին վերստին Ջուլֆա հասցնելու համար: Անդրանիկի վարած ճակատա-մարտերի ամենաճշմարտացի նկարագրություններից մեկի հեղինակը՝ զորավարի թիկնապահ և քարտուղար Վահան Թոթովենցը, այսպես է գնահա-տել այս խելահեղ ճակատամարտը. «Քրիստոսի 1918 թվականին Անդրանիկ մինևնույն պատմական և մեր քաղաքական դեմքը պայծառացնող Ավարայրի դաշտին վրա մղեց իր և մեր ժողովուրդին ամենեն խոշոր հերոսամարտերեն մեկը:

⁸ «Ջարթոնք» (Բեյրութ), 1. IX. 1977, Ծ. Ա դ ա յ ա ն. Անդրանիկ, Երևան, 1994, էջ 635–636:

Վարդան Մամիկոնյան ինկավ այդ դաշտին վրա, փրկելով իր ժողովուրդի իտեայր, իսկ Անդրանիկ ապրեցավ և հաղթեց, ապրեցավ և մղեց ուրիշ ճակատամարտներ և տեսավ Հայոց աշխարհի ազատության արշալույսը, որուն համար նա բրած է խոշորագույնը»⁹:

Մեր ժողովրդի հոգեկերտվածքին խորթ է կուրորեն մեկին հետևելը, իր ճակատագիրը անվերապահորեն մեկին փստահելը: Միակ բացառությունը Անդրանիկն է, ում հետևից ոտքով ու սայլերով անցավ ամենօրյա մարտերով ու այլևայլ աղետներով հագեցած մի դժոխային ճանապարհ՝ Կարսից, Ալեքսանդրապոլից Ջալալօղլի – Դսեղ – Դիլիջան – Սևան, Սելիմի լեռնանցքով՝ Վայոց ձոր – Նախիջևան – Ջուլֆա, հետևեց նրան անգամ հայրենի սահմաններից անդին՝ դեպի Խոյ, այնուհետև վերադարձավ Ջուլֆա – Նախիջևան – Ջանգեզուր – Դարալագյազ – Երևան: Այս մասին ուշագրավ հուշագրություն է թողել ռուս գորական՝ սիբիրցի պորուչիկ Ալեքսեյ Կոլմակովը¹⁰: Երանի Ալեքսեյ Կոլմակովը այս դեպքերից երեք տարի առաջ՝ 1915-ին էլ եղած լինել մեր օաներկրորդ¹¹ հերոսի կողքին և նույնպիսի պատկերավորությամբ նկարագրեր Կովկասյան տարածաշրջանում երբևէ տեղի ունեցած ամենավճռորոշ ճակատամարտերից մեկը՝ Դիլմանի ճակատամարտը: Ավարայրի դաշտից ոչ շատ հեռու՝ հյուսիսարևելյան Դիլման գյուղաքաղաքի մոտ 1915-ի ապրիլին ռուսական բանակը Անդրանիկի շնորհիվ ջախջախեց թուրքերին, ինչի արդյունքում ողջ Կովկասի քրիստոնյա բնակչությունը փրկվեց անխուսափելի սպանդից: Դիլմանում հաղթելու պարագայում էնվերին այլևս ոչինչ չէր խանգարելու կյանքի կոչել թուրքերի վաղեմի երազանքը՝ պանթուրքական հրեշավոր ծրագիրը: Դիլմանից հետո թուրքական զորաբանակը ծրագրել էր հասնել Բաքու, այնտեղից՝ Թիֆլիս և Կովկասը կտրել Ռուսաստանից: Իրադարձությունների նման զարգացման պարագայում դժվար չէ կրահել, թե ինչ էր սպաս-

⁹ Արսեն Մարմարյան (Վ. Թոթովենց). Ջոր Անդրանիկ և իր պատերազմները, Կ. Պոլիս, 1920, էջ 401:

¹⁰ Այդ մասին մանրամասն տե՛ս Արսեն Մարմարյան (Վ. Թոթովենց). նշվ. աշխ., էջ 382, В. А. Микаелян, А. А. Закарян. Поручик Колмаков о деятельности Андраника в 1918 г. – «Вестник общественных наук АН АрмССР, 1988, № 8, с. 62–84; Մ. Խանգաղյան. Անդրանիկ, Երևան, 1989, Գ. Ղարիբջանյան. Ժողովրդական հերոս Անդրանիկ, Երևան, 1990, Հ. Միմոնյան. Անդրանիկի ժամանակը, հ. 2, Երևան, 1996, Ա. Հ. Ջաբարյան. Ռուս զինվորականները և սիբիրյան հայկական վաշտը.– Օձայկական բանակ, 2003, -1, էջ 80–85, Поручик Алексей Колмаков. Историческая армянская рота. Сост. и подготовил к изданию доктор филолог. наук Анушаван Закарян. Ереван, 2009; Ռ. Միմոնյան. Անդրանիկ. Միբիրական վաշտի ողիսականը, Երևան, 2006:

¹¹ Անդրանիկին տրված «աներկրորդ» որակումը պատկանում է եղեռնամահ գրող Ռուբեն Ջարդարյանի որդուն՝ արձակագիր Հրաչ Ջարդարյանին. «Ա՛հ, ե՛րբ, ո՛վ օր մը պիտի հաջողի այս աներկրորդ, այս հայ Աքիլեսին կյանքը տալ, հույն հերոսն այլապես իմաստուն, այլապես մեծ ռազմավար: Նորահայտ Սողոմոն, ռազմիկին, ռազմավարին, դատախազին, դատավորին, իշխանին բոլոր ստորոգելիները: Եվ այս բոլոր շքեղության վրա՝ ոչ մեկ բիծ: Ոչ մեկ դույզն ընկրկում կարելի է արձանագրել: Ան կմնա հայ ժողովրդի պատմության մեծակառույց կոթողը, իբր խորհրդանիշ անոր հավերժական հպարտության» (տե՛ս Ա. Չելեպյան. Ջորավար Անդրանիկ, Երևան, 1990, էջ 676–677):

վելու նաև արևելահայությանն ու Վրաստանին: Ահա մինչև Միջին Ասիա ու Հեռավոր Արևելք ձգվող մեծ Թուրքիա ստեղծելու թուրքական զառանցանքը հօդս ցնդեցրեց մի Չորավար, որը երբեք բանակ չի ունեցել: Ահա թե ինչու էր ողջ թուրք ցեղը, շարքային ասկյարից, ենիչերիից, թալանչի բաշիբոզուկից մինչև տեսակ-տեսակ փաշաները, անեծքով ու զարհուրանքով տալիս Անդրանիկի անունը: Եվ ահա թե ինչու Անդրանիկի անունը մեկընդմիջտ ամրագրվեց ռուս պատմագրության հերոսական էջերում: Ամրագրվեց մեծարանքով ու հիացմունքով:

Ոչ մի հերոս՝ իրական թե երևակայական, համեմատելի չէ Անդրանիկի հետ: Իր հմայքով ու կատարելությամբ Անդրանիկին, թերևս, փոքր-ինչ մոտենում է միայն... Մասունցի Դավիթը: Այո՛, միայն էպոսը, առասպելը և այն էլ փոքր-ինչ, քանի որ ժողովրդի կերտած այս իդեալ-հերոսն անգամ խոցելի է, նրան մեկ անգամ չէ, որ թշնամին խաբեց ու մոլորեցրեց, իսկ Անդրանիկին ոչ ոք չկարողացավ խաբել, ոչ թշնամին և ոչ էլ նախանձից ու քինախնդրությունից կուրացած «յուրայինը»: Ճիշտ է, «վերջիններս» դավեցին ու խարդավեցին, դառնացրին ու թունավորեցին նրա կյանքը, ի վերջո, գերեզման հասցրեցին, բայց խաբել ու մոլորեցնել չկարողացան:

Հետաքրքիր է, որ ուրացումն ու դավերը տեղ էին գտնում նաև թուրքերի հետ ունեցած առերես բանակցություններում կամ նրանց ուղարկված հեռագիր-հաղորդագրություններում: Գուցե սա ինչ-որ տեղ բացատրելի է. օրհասական վիճակի մեջ հայտնված նորանկախ Հայաստանի Հանրապետության պատասխանատուները փորձում էին ամեն կերպ սիրաշահել անողորմ թշնամուն՝ քաջ գիտակցելով, որ թուրքի գլխավոր մտահոգությունը Անդրանիկի ինքնիշխան ներկայությունն է տարածաշրջանում: Բայց արի ու տես, որ դրանով նրանք ոչ թե շահում էին թուրքի բարեհաճությունը, այլ ավելի էին սաստկացնում իրենց հանդեպ թշնամու արհամարհանքը: Ինչպես, օրինակ, նույն 1918-ին, Թիֆլիսում, օսմանյան գորահրամանատարներ Վեհիբ, Խալիլ և Նուրի փաշաների հետ մի հանդիպման ժամանակ: Երբ Վրաստանում ՀՀ դեսպան Արշակ Ջամալյանը փորձում է վերստին հավաստիացնել թուրքերին, թե Անդրանիկն օրենքից դուրս է հայտարարված, թե իրենք չեն ճանաչում նրան և ամեն ինչ պետք է անեն՝ պայմանագրով Հայաստանի մաս չկազմող Չանգեզուրից նրան հեռացնելու համար, Խալիլ փաշան այսպիսի խոսքեր է շարտում նրա երեսին. «Մենք ալ մի վայրկյան ենթադրենք, թե դուք անոր քրած գործերը չեք գիտեր և անոր հետ կապ չունիք, բայց գեներալ Անդրանիկ ինք շատ լավ գիտե թե ինք ի՞նչ կընեն...»

Հաճախ կմտածեմ և ինքնիրենս կսեմ թե այս մարդը երեսուն տարի է, որ մեր դեմ կկռվի, արդյոք չի ձանձրացա՞վ, չի հոգնեցա՞վ կամ չի ծերացա՞վ: Դուք ինչ կուզեք այն ըսեք կամ ջանք թափեցեք հավատացնել մեզ, կամ ուրանալ զայն և իր գործերը, մենք կճանչնանք և գիտենք թե ո՞վ է ան: Կցավիմ, որ Հայ ծներ է»¹²:

Ի դեպ, սրանք այն փաշաներից են, որոնք տարբեր ճակատներում ջարդ էին կերել Անդրանիկից:

¹² Չորավար Անդրանիկի Կովկասյան ճակատի պատմական օրագրությունը (օրագրված Չորավարին թիկնապահ զինվորեն), Բոստոն, 1924, էջ 147:

Դժվար է ասել՝ եթե Անդրանիկն ապրած ու գործած լիներ 1000 կամ 2000 տարի առաջ, արդյո՞ք մեր ժողովուրդը կարիք կունենար Սասունցի Դավիթ ստեղծելու: Համենայն դեպս, Հրանտ Մաթևոսյանի հանճարեղ դիտարկումը մտորելու տեղիք է տալիս. «Ձորավար Անդրանիկը, Անդրանիկ Օզանյանը մեզ համար նույնքան առասպելական է, դյուցազներգային, վիպերգային, ինչքան Դավիթը՝ իրական. համաժողովրդական սիրո հրապարակը այդ երկու իրական և վիպերգային հերոսների երթն է դարձնում պսակյալ շքերթ, մարդու և զինվորի իր իդեալով իր Անդրանիկին է հանդերձավորում, և իր Անդրանիկը՝ ժողովրդի Անդրանիկը, իդեալ մարդու կերպարը իր վրա է առնում ճիշտ և ճիշտ այնպես, ինչպես Դավիթ Սասունցին Մհեր Սասունցու զենքուզրահն է իր վրա առնում»¹³:

Նշենք նաև, որ Ձորավարի գործի ու հիշատակի հանդեպ խարդավանքն այսօր էլ շարունակվում է՝ մոլորության մեջ գցելով պատմությանն անհաղորդ նոր սերնդին և մեզ ավելի հեռացնելով մեր մեծագույն հերոսից:

Անցյալ դարի 60–70-ական թվականների հայաստանյան սերունդը գիտեր, որ խորհրդային պատմագրությունը մի հաստաբեւտ տապանաքար է՝ դրված իրական պատմության, պատմական եղելության ու իսկության վրա: Գոնե Պարույր Սևակն այդպես էր մտածում. «Իմ սերունդը Անդրանիկի մասին շատ քիչ բան գիտի, չասելու համար՝ համարյա բան չգիտի: Սրա համար կարելի է ամոթից գետինը մտնել, որովհետև Անդրանիկի մասին բան չիմանալը հավասար է իր ժողովրդի նորագույն պատմությանը անզետ լինելուն: Բայց ամոթից գետինը պիտի մտնենք ոչ թե մենք, որ մի ամբողջ սերունդ ենք, այլ նրանք, որոնց վզին է ընկնում մեր այս անգիտության բացատրելի, բայց անքավելի մեղքը...»¹⁴:

Եվ 90-ականներին, երբ սահմանները բացվեցին, և Հայաստանը հեղեղվեց սփյուռքահայ պատմագրական-հուշագրական տասնյակ ու տասնյակ մեծ և փոքր հատորներով, մենք այդ ամենն ընդունեցինք որպես կենարար թթվածին, որպես բացարձակ ճշմարտություն ու մնացինք այդ «ճշմարտության» տակ: Շատ քչերը գլխի ընկան, որ այդ ամենը մեծավ մասամբ պատվիրված կեղծիք է, հետևողականորեն կազմակերպված խարդավանք: Քչերը գլխի ընկան, որ չիմացությանը փոխարինելու է եկել թյուրիմացությունը: Բայց լսենք ժամանակի առավել բարեխիղճ գործիչներից Գարեգին Նժդեհին. «Այսպես կոչված հայասեր քարոզչության համար Դաշնակցությունը ոչինչ չի արել: Ժամանակ չունեք: Նա զբաղված էր Անդրանիկին սևացնելու անշնորհակալ գործով: Անդրանիկին վարկաբեկելու համար Դաշնակցության պատվերով հրատարակվեց նրա դեմ ուղղված մոտ 1000 էջանոց երկհատոր աշխատություն: Մեպուհի՝ ամբողջությամբ Անդրանիկին նվիրված հուշագրությունն Ազգային Հերոսին իր փառքի բարձունքից տապալելու դատապարտելի փորձ է: ... Բոլոր ջանքերը ներդրվեցին՝ Անդրանիկին «գարդարելու» քաջնազարյան (դոն-քիշոտյան) որակումներով՝ չզիտակցելով, որ դրանով իրականում ծիծաղում են Հայ Ազատագրական Շարժման վրա, քանզի ժողովուրդն Անդրանիկին համարում է Հայ Ազատագրական պայքարի խորհրդանիշ: Անկում են ապրում

¹³ Հ. Մ ա թ և ո ս յ ա ն. Սպիտակ թղթի առջև, Երևան, 2004, էջ 332:

¹⁴ Ա. Չ ե լ ե պ յ ա ն. նշվ. աշխ., էջ 663:

բոլոր այն ժողովուրդներն ու կուսակցությունները, որոնք թեթևամտորեն են վերաբերվում սեփական հերոսականությանն ու հերոսներին: Այդ հոգևոր վայրագությունը մեր երիտասարդ սերնդի վրա թողեց առավել քայքայիչ ազդեցություն»¹⁵:

Նժդեհի՝ այս տողերը գրելուց անցել է 70 տարի: Նրա նշած 1000 էջը այդ ընթացքում դարձել է 10000, 100000 և դեռ շարունակում է ավելանալ: Դիպվածով կուսակցապետ, վարչապետ ու նախարար դարձած, երկիր ու ժողովուրդ տանուլ տված գրող-գրագետ-վարժապետներն այս կերպ իրենց մեղքերն էին բարդում Զորավարի հաղթ ուսերին, և նրանց մոզոնած կեղծիքը ավանդաբար «սկզբնաղբյուր» է ծառայում ժամանակաշրջանն ուսումնասիրողների համար՝ ծնունդ տալով նոր գեղծարարությունների: Ընդ որում, Մեպուհի՝ վերը նշված երկհատոր խեղկատակությունը¹⁶ չարյաց փոքրագույնն է: Այս փաստներ գորականը հեռու էր գրական-վերլուծական շնորհներից և իր երբեմնի հրամանատարի հասցեին ուղղված նրա անհողաբաշխ լուտանքները միայն խղճահարություն են առաջացնում հեղինակի հանդեպ: Առավել խորամանկ է վարվել քաղաքական հարաբերություններում թրծված ու բազում շնորհներով օժտված Ռուբեն Տեր-Մինասյանը: Հայդուկական շարժումներից մինչև Առաջին Հանրապետության ստեղծումն ընդգրկող ժամանակաշրջանի մասին նա ամբողջ յոթ հատոր ուշագրավ աշխատություն գրեց¹⁷, որի էջերում Անդրանիկն ընդամենը մի քանի անգամ է հիշատակվում և այն էլ՝ խիստ հպանցիկ: Այսինքն, ներկայացնում է հայ ազատագրական պայքարի ողջ ուղին, որտեղ ամեն ինչ կա, բացի այդ պայքարի ողնաշարից: Սա ոչ թե միտումնավոր, այլ հրեշավոր «բացթողում» է: Այսպիսիներին է վերաբերում Բեյրութի «Շիրակ» ամսագրի խմբագրապետ Օննիկ Մարգհայանի մի թափանցիկ դիտարկումը. «Հայ կամավորության, հայ պայքարին ու դատին նվիրված որևէ երկ անարգանքի պիտի արժանանա, եթե իր էջերեն բացակային Անդրանիկի կյանքն ու գործը, եթե անոր ընդմեջեն չճառագայթե Մասնո Արծիվին խրոխտ այլ պայծառ դեմքը, որ «անկարելիի ապառաժներուն դեմ ընդվզումին համառ ու ամենի կոծումը նշանակեց»¹⁸:

¹⁵ Գարեգին Նժդեհ, Երևան, 2011, էջ 286: Հանուն ճշմարտության պետք է նկատել, որ Նժդեհը ևս գերծ չի մնացել Անդրանիկի ուղղությամբ քար նետելու գայթակղությունից: Երբ նա փորձեց ինքնուրույն լինել, մասնավորապես, երբ Միյուրքում սկսեց քարոզել իր «Յեղակրոն» վարդապետությունը և անխնա հալածանքների ենթարկվեց իր կուսակիցների կողմից, այնժամ զգաց, որ հայ իրականության մեջ ինքնուրույն և ինքնիշխան կարող էր լինել միայն Անդրանիկը: Եվ մինչև 1920 թ. իր կողմից սիրված և մեծարված կուսակցապետերն ու կուսակցական ընկերները (Ս. Վրացյան, Ռ. Տեր-Մինասյան, Դրո և այլն) նրա հետագա նամակներում ու այլ գրություններում մեկեն որակվեցին ավազակ, թշվառական, ընկերադավ, մորթապաշտ, հրեշ, փարիզաբնակ չարիք, փարիզաբնակ սրիկա, փարիզի դավադիր (Ռ. Տեր-Մինասյանն ապաստանել էր Փարիզում), հրեից փեսաներ (Ս. Վրացյանի և Ռ. Տեր-Մինասյանի կանայք հրեուհիներ էին) և այլն (տե՛ս նույն տեղում, էջ 122–147):

¹⁶ Մ է պ ու հ. Էջեր իմ հուշերեն, Բոստոն, հ. Ա, 1925, հ. Բ, 1929:

¹⁷ Ռ ու բ է ն. Հայ հեղափոխականի մը հիշատակները, 7 հատորով, Երևան, 1990:

¹⁸ «Զարթոնք», 1. IX. 1977:

Ձորավարին ամեն գնով նսեմացնելու խոտոր ճիգերը սովորաբար գնահատվում է որպես նրա համաժողովրդական փառքի հանդեպ անձնական կամ կուսակցական նախանձի դրսևորում: Մա, անշուշտ, ճիշտ է: Մակայն սա երևույթի միայն արտաքին կողմն է, արմատներն ու միտումը ավելի խորն են: Երկիրն հանձնած ու նախարարական այթոռներից զրկված գրող-գրագետ-վարժապետները Սփյուռքում իշխելու իրավունք ստանալու համար պիտի «մաքրվեին» իրենց մեղքերից: Ո՛ւմ վրա պիտի բարձեին այդքան մեղքը: Ո՛վ կարող էր կրել մի ողջ սերնդի մեղքը, եթե ոչ Անդրանիկը, որին ժողովուրդը վաղուց հոր իրավունքներով էր օժտել: Հայրերը միշտ էլ «մեղավոր» են: Եվ սկսեցին անհնա բարձել: Հետաքրքիր է, որ երբ նրանցից մեկը՝ Հովհ. Քաջագունունին հրապարակեց իր «ՀՀ Դաշնակցությունը անելիք չունի այլևս» գիրք-խոստովանանքը (Վիեննա, 1923), չուշացավ Անդրանիկի արձագանքը. «...«Անելիք Չունինք»-ի հայտարարությունը նախարարի այթոռն է պետք է կատարելի, եթե լսելի չըլլար ձայնդ, հրաժարականիդ հետ մեկտեղ դուրս գալու էիր պատվավորապես: Երբ դուն այսօր գոջումե մը վերջ կգզուշանաս պատասխանատու որևէ գործե, հին ընկերներդ՝ շատ մը սխալներե վերջ, դեռ գոջում ու դարձ չունեցան... գեթ հանդարտ մնալու էին Հայաստաններու ժողովներուն և Ազգ. Ընկերակցության մեջ իրենց քիթերը խոթել և անպատվել ամեն բան...»

... Ինկան անոնք իրենց նախարարի խարխուլ այթոռներեն և գացին հասան հոն, ուր որ իրենց հարմար էր և վայել. վարժապետը՝ վարժապետի, բանաստեղծը՝ բանաստեղծի, բժիշկը բժիշկի այթոռին և դիրքին վրա»¹⁹:

Պատմությունը սիրում է անողոր կրկնություններ: Հայաստանի Երրորդ Հանրապետության դեկին ևս նախապես հայտնվեցին գրող-գրագետ-վարժապետներ: Թե նրանք ինչպիսի թշվառության ու չքավորության հասցրին ժողովրդին, բոլորին է հայտնի: Մնում է մխիթարվել գոնե, որ նրանցից մեկն իր սրտում Անդրանիկ ուներ և տասնամյակների հետվից ճշմարիտ մեծարանքով է գնահատել Ձորավարի վերջին արշավանքի ազգամիրկիչ առաքելությունը. «... հեռվում ձգվող լեռնաշղթաների վրա շաղվող հայացքիս դեմ հաճում էր Ձորավարի առաջնորդած գաղթականության խմբակային ուրվականը...»

... Ի՛նչ հեղինակության տեր պիտի լինեք մարդը, որ կարողանար հետապնդող թշնամու վերահաս գնդակի տակ սովյալ ժողովրդին տանել այդ տանջանքի աղեղով, որի վրա են ընկնում Հայաստանի բոլոր լեռնանցքները, և ճակատ տար այս անգամ Խոյի կողմից ներխուժող թուրքին, ապա ևս մի ծանր նահանջով գորքն ու բազմապատկված ժողովրդին անցկացնեք Ջանգեզուրի լեռնաշղթան և Ջանգեզուրը պահեր մեզ համար: Եվ ի՛նչ ապաբախտ պիտի լինի գորավարը, որ այդքան կաշկանդված լինի իրեն ապավինած ժողովրդի ապահովության հոգսով ու չկարողանա իրեն վայել թափով շուռ գա, իր ծանր ձեռքը բարձրացնի աստելի թշնամու վրա... Թուրք ավարառուի ամեն անգամ բերող բախտից էր, որ տասնութ թվականի մայիսից հետո գորավարի ձեռքերը կապված էին գաղթականության բախտով»²⁰:

¹⁹ Ձորավար Անդրանիկի Գովկասյան ճակատի պատմական օրագրությունը, էջ 194:

²⁰ Վ ա ն ո Ս ի ր ա դ ե դ յ ա ն. Ծանր լույս, Երևան, 1987, էջ 173:

Հերոսները ծնվում են ժամանակի պահանջով, այն պատմական իրավիճակի պահանջով, որում հայտնվում է տվյալ երկիրն ու ժողովուրդը: Մեզանում նա այդպես է եղել, սակայն հերոսի ու հերոսականության մատուցումը հաճախ աններելիորեն խեղաթուրվել է: Մեր հերոսներին հաճախ «ստեղծել» են պատմիչը, եկեղեցին, կուսակցությունը, պետությունը, ազգային անվտանգությունը... Սրանց հերթագայությունը բերում է հերոսների հերթագայություն: Սրանց հերթագայությունը հերոսների աստղաբույլից առանձնացնում է մեկ-երկուսին՝ «հարմարեցնելով» նրանց օրվա քաղաքական տարուբերումներին:

... Երեկ մեր հերոսը Արամ Մանուկյանն էր, առաջի օրը՝ Դրոն, դրանից առաջ՝ բոլշևիկ գործիչներն էին, ավելի վաղ՝ հերոս էինք ստեղծում պատմության ուրվականներից (Տիգրան, Վարդան...), հետո վիճարկում նրանց արածն ու չարածը:

Այսօրվա մեր հերոսը ավելի արժանավոր է՝ Գարեգին Նժդեհ: Վաղը, թերևս, կհիշենք մյուս նվիրյալ-արժանավորներին՝ Մախյուտոյին (Մմբատ Բորոյան), Սեբաստացի Մուրադին (Խրիմյան), Քեռուն (Արշակ Գավաֆյան)... Այս բոլորը մի-մի պղնձակուռ աստիճաններ են, որոնցով ոչ թե պիտի անվերջ շրջապտույտ գործենք ու խարխալենք, այլ երբևէ բարձրանանք վեր, դեպի գագաթը՝ դեպի Անդրանիկը:

АНДРАНИК: ЗНАКОМЫЙ И НЕЗНАКОМЫЙ ГЕРОЙ ГЕРОЕВ

КАРО ВАРДАНЯН

Резюме

Зоравар Андраник является величайшим армянским национальным героем. Если имя любого другого из наших героев связано с тем или иным значительным боевым сражением, или с каким-нибудь конкретным армянским территориальным пространством, то отблески побед Андраника прослеживаются по всей территории исторической Армении: от Сасуна-Тарона до Нахичевани, Сюника и Карабаха. Еще со времен фидаинов боевая изощренность, невообразимая смелость Андраника, а также его рыцарский образ стали темой народных песен, сказаний и бесед. Однако общенародная известность и слава отважного полководца не давали покоя партийно-политическим кругам, которые параллельно с легендами, сплетенными вокруг Зоравара, заложили основы лживой историографии, существующей по сей день, с одной лишь целью – бросить тень на славное имя народного героя.

ANDRANIK. KNOWN AND UNKNOWN HERO OF HEROES

KARO VARDANYAN

Summary

Zoravar Andranik is the greatest Armenian national hero. If the name of any other of our heroes is connected with a certain significant battle or any Armenian district, Andranik's victorious tracks are seen in the whole historical territory of Armenia – from Sasun-Taron to Nakhijevan, Syunik and Gharabagh. Since the times of fedayees Andranik's military resourcefulness, unimaginable courage and knighthood have become a theme for national songs and tales. His nationwide glory didn't give the party and political figures rest. They created a false historiography having for an object to cast a shadow on the glorious name of the national hero.